

嘉業堂
叢書

中書典故彙記

第二冊

中書典故彙紀卷二

仁和王正功輯

錢塘趙輯寧校補

職掌上

中書政本也居喉舌之任天下之事咸共平章
必詳載之者蓋重其典也若周之內外史秦之
尙書郎漢之內史舍人唐宋之翰林學士明之
內閣雖不以中書省名而職掌則同故并錄之
周官內史掌王之八枋之法以詔王治一曰爵二曰祿
三曰廢四曰置五曰殺六曰生七曰予八曰奪執國法
及國令之貳以考政事以逆會計掌敘事之法受納訪

以詔王聽治凡命諸侯及孤卿大夫則策命之凡四方之書事內史讀之王制祿則贊爲之以方出之賞賜亦如之內史掌書王命遂貳之

周禮

按註疏云內史猶今之內制也上所制而下守之爲法上所命而下臬之爲令皆著之於書內史則掌其副貳也王言之出爲命內史書於策而頒之又書副本爲藏之

周官外史掌書外令掌四方之志掌三皇五帝之書掌達書名於四方若以書使於四方則書其令

周禮

按註疏云外史卽今之外制也外令謂王命之頒于外國者使者奉詔令以使于諸侯外史書其詔令以

授之猶今之誥勅也

寅亮天地弼予一人

周官

大司寇以獄之成告于王王命三公參聽之

王制

三公王宣德化調七政和陰陽之官也

漢書天文志

秦置丞相掌丞天子助理萬機

文獻通考

中書舍人秦爲尙書郎掌奏事草詔令

閱史約書

漢置內史舍人尙書郎直宿建禮門奏事明光殿下筆

爲詔誥出語爲詔令

山堂肆考

按初學記云漢中書舍人無聞其職

周勃爲右丞相上問勃一歲決獄幾何勃謝不知問錢穀一歲出入幾何又謝不知上問陳平曰各有主者上

曰君主何事曰宰相者上佐天子理陰陽順四時下遂萬物之宜外鎮四夷諸侯內撫百姓使卿大夫各任其職

前漢書

三公聽察長吏臧否人所疾苦條奏之是爲舉謠言也

漢官儀

漢內史舍人魏中書通事舍人自此以後並贊機務唐始專典文章梁陳尤爲政府要官始去通事之名

閱史

約書

東漢以尙書郎主機事自魏以中書代之雖亦不廢尙書然中書親近而尙書疏外矣

詞林典故

魏置中書省有監令遂掌機衡之任而尙書之權漸減

矣

文獻通考

魏文帝置中書監令並掌機密自是中書多爲樞機之任

同上

魏初中書通事舍人主呈奏

山堂肆考

晉中書監令掌贊詔命記會時事典作文書

文獻通考

魏晉重中書之官爲喉舌之任則尙書之職稍以疏遠

至梁陳舉國機要悉在中書

同上

晉中書侍郎其職副掌王言更入直省五日從駕則正

直從次直守

同上

晉江左舍人通事謂通事舍人掌呈奏案章後省之而以中書侍郎一人直西省卽侍郎兼其職而掌其詔

令同上

晉中書令管機務蓋宰相之任而秘書著作統焉六朝唐宋沿之不改即明大學士統翰林院而翰林所謂入閣辦事亦倣於此

詞林典故

東晉以後天子以侍中常在左右多與之議政事不得專任中書于是又有門下而中書之權又分

文獻通考

宋初置中書通事舍人入直閣內出宣詔命凡有陳奏皆舍人持入參決于中自是則中書侍郎之任輕矣

同上

齊中書所掌與晉宋同

通典

齊梁通事舍人掌傳宣令旨內外啟奏

文獻通考

梁除通事字直曰中書舍人專掌詔誥兼呈奏之事魏
晉以來詔誥並中書令史侍郎掌之至是始專于舍人
通志

按隋書其後除通事直曰中書舍人

梁以中書侍郎功高者一人主省內事陳因之
文獻通考

陳中書所掌與梁同
通典

東魏以高澄領中書監移門下機事總歸中書
通鑑

北齊舍人省掌署勅行下宣旨勞問
文獻通考

北齊中書省管司王言并司進御之樂及清商龜茲諸

部伶官
通典

後周置內史中大夫掌王言

文獻通考

北周外史掌書王言及動作之事以爲國志

通典

隋中書監令掌出納帝命侍郎以功高者一人主省內

事

隋書

隋中書通事舍人承旨宣傳

文獻通考

隋內史舍人專掌詔誥

同上

唐中書令掌侍從獻替制勅冊命敷奏文表授冊監起

居注總判省事

同上

中書侍郎掌侍從獻替制勅冊命敷奏文表通判省事

同上

唐中書令佐天子執大政凡王言之制有七皆宣署申

覆然後行焉大祭祀則相禮貌征纂嚴則戒飭百官臨
軒冊命則讀冊若命于朝則宣授而已冊太子則授璽
綬凡制誥文章獻納以授記事之官

唐書百官志

按六典云凡王命之制有七一曰冊書立后太子封
藩寵命臨軒備禮則用之二曰制書行大典賞罰授
大官爵釐革舊政赦宥降虜則用之三曰慰勞褒贊
遣勞則用之四曰發白敕增減官員廢置州縣徵發
兵馬則用之五曰敕旨爲百官承旨而爲程式奏事
請施行者六曰敕書慰諭公卿戒約臣下則用之七
曰敕牒隨事承旨不易舊典則用之

按春明退朝錄云或問今之敕起何時按蔡邕獨斷

曰天子下書有四一曰策書二曰制書三曰詔書四曰戒敕然自隋唐以來除改百官必有誥敕而從敕字唐時政事堂在門下省而除擬百官必中書令宣侍郎奉舍人行進入畫敕字此所以爲敕也然後政事堂出牒布于外所以云牒奉敕也字書不載敕字而近世所用也

中書侍郎掌貳令之職朝廷大政參議焉臨軒冊命爲使則持冊書授之四夷來朝則授其表疏而奏之獻賁幣則受以付有司

同上

唐張延賞奏故事冊拜三公中書令讀策侍中奉禮如闕卽以宰相攝之

山堂肆考

唐以中書出詔令門下掌封駁日有爭論紛紜不決故使兩省先于政事堂議定後奏

文獻通考

何良俊曰凡朝廷有大政令則由門下省奏上發中書省看詳仍發門下省下尙書省施行故尙書拜相則曰同中書門下平章事者是也當政體互相鈐轄事權常分使門下尙書二省堅持官守不相阿縱則宰相之權初亦甚輕但看詳由于中書則主張庶務皆由其手其權安得不日漸隆哉故唐宋時卽有宰相如元載盧杞秦檜賈似道者蓋由此也

春明夢餘錄

唐中書舍人專掌詔誥侍從署敕宣旨勞問授納訴訟敷奏文表分判省事自永淳以來天下文章道德臺閣

髦彥無不以文章達故中書舍人爲文士之極任朝廷之盛選諸官莫比焉

文獻通考

唐中書舍人掌侍奉進奏參議表章凡詔旨制敕及璽書冊命皆按典故起草進畫既下則署而行之其禁有四一曰漏洩二曰稽緩三曰遺失四曰妄誤所以重王命也制敕既行有誤則奏而改正之凡大朝會諸方起居則受其表狀而奏之國有大事若大克捷及大祥瑞百寮表賀亦如之凡冊命大臣于朝則使持節讀冊命命之凡將帥有大賓客皆使以勞問之凡察天下冤滯與給事中及御史三司鞠其事凡有司奏議文武考課皆預裁焉

唐六典

中書舍人給事中每年各一人監考內外官使其中書舍人在省以年深者爲閣老兼判本省雜事一人專掌畫謂之知制誥得食政事之食餘但分署制敕六人分押尙書六司凡有章表皆商量可否則與侍郎及令連署而進奏其掌畫事繁或以諸同官兼者謂之兼知制誥

同上

按李泌傳云給舍分司押故謂六押

張說爲中書舍人受詔與諸儒草儀多所裁制

通鑑

唐太宗諭房杜曰公聽受詞訟日不暇給安能助朕求賢乎卿自今凡事關大體者裁決其餘細務濶略可也

中興會要

唐故事軍國大事則中書舍人各執所見雜署其名謂之五花判事中書侍郎中書令審之給事中黃門侍郎校正之上始申明舊制鮮有敗事上謂侍臣曰中書機要之司詔赦有不便者皆應論執若但行文書則誰爲不可

同上

中書通事舍人上掌朝見引納殿庭通奏凡近臣入侍文武就列則導其進退而贊其拜起出入之節蠻夷納貢皆受而進之軍出則受命勞遣旣行則每月存問將士之家視其疾苦凱旋則郊迎

唐書百官志

唐詔令雖一出于翰林學士然遇有邊防機要大事學士所不能盡知者則多宰相以其處分之要者自爲之

詞而付學士使增其首尾嘗式之言而已謂之詔意故無所更易今猶見於李德裕鄭畋集中近歲或盡出于宰相進呈訖但召待詔卽私第書寫或詔學士宰相面授意使退而具草然不能無改定也

石林燕語

故事承宣制皆出宰相侍郎署銜而已崔沔爲中書侍郎曰設官分職上下相維各申所見乃無失侍郎令之貳也豈得拱默而已

通鑑

唐改通事謁者爲通事舍人掌通奏引納辭見承旨宣勞皆以善辭令者爲之隸四方館又屬中書省

文獻通考

起居郎掌錄天子之動作法度以修記事之史屬門下

省起居舍人掌錄天子之制誥德音以修記言之史屬

中書省

六典

太宗命自今大辟皆令中書門下四品以上及尙書議
之通鑑

按 國朝決囚及盜犯令三法司核擬并令大學士
會議列名具奏

長壽中宰相姚璹表請仗下所言軍國政要宰相一人
撰錄每月封送史館謂之時政記

唐書

裴休奏言時政記者非一悉詳所厚善畧所憎忌且事
有本末史莫得詳自今宰相人自爲記合付史館詔可
同上